

Gangjgyaq

砍 价

Miz ngoenz ndeu, daxboh daxmeh caeuxcaeux couh okbae banh saeh lo, gou sij sat cozyez le, sawqmwh siengj hwnj lauxsae ciengzseiz naeuz aeu bang vunzhung guh di saeh. Gou guh gijmaz ndei ne?

Mwhde, laj laeuz cienz daeuj sing boh' au hemq: "Sou huqrwix —" Gou sawqmwh siengj hwnj geij ngoenz gonq daxmeh sousib ndaw ranz, dawz haujlai bauqceij gaeuq doi youq gwnz yangzdaiz. Deng ha! Neix mbouj cingq dwg baez gihvei ndei ndeu ha? Yienghneix gou buet daengz henz cueng hemq boh' au. Gvaq yaep ndeu, boh' au daeujdaengz bakdou ranz gou, gou cam de: "Bauqceij gaeuq gaen geijlai cienz?" Boh' au itmienh caengh itmienh naeuz: "Seiq gak haj faen gaen ndeu, mwngz gijneix itgungh roek gaen."

Gou siengj: Boh' au dwg mbouj dwg yaw gou dwg lwgnyez yaeuh gou ne? Gou geiq ndaej daxmeh daiq gou bae haw cawx byaek, cungj caeuq vunz gangjgyaq, ngoenzneix gou hix gangjgangj gyaq. Gou doiq boh' au naeuz: "Seiq gak haj faen daiq bengz luba, mwngz dawz riengsoq cawz bae, seiq gak gaen ndeu ndaej lwi?" "Ndae, seiq gak couh seiq gak!" Boh' au han ndaej gig sangj, ndenq cienz hawj gou, gipgip muengznuengz roengz laeuz bae lo.

Banngaiz, daxboh daxmeh dauqma lo, gou angqvauvau dawz gienh saeh neix gonqgonq laenglaeng gangj hawj gyoengqde dingq, caj gyoengqde haenh gou. Byawz rox, gyoengqde dingq gou gangj le, cungj riuhaha, hawj gou

geizheih raixcaix. Daxmeh lwnh gou: "Gou cawx byaek gangjgyaq dwg aenvih gou dwg bouxcawx, mwngz gai bauqceij gaeuq, mwngz dwg bouxgai, bouxgai baenzlawz ndaej gangjgyaq ne? Baezlaeng guh gijmaz saeh, cungj yaek doenghdoengh uk cij ndaej ha!"

Laxlawz, gangjgyaq hix yaek doenghdoengh uk bw!

(Denhcinh Si Yiyangz Meizgyanghvanh
Gozci Yozyau sam nienzgaep Hanz Fazmingz)



Seizcou Ndaw Da Gou

我眼中的秋天



Seizcou lumj dah sien ndeu, laeglemx daeujdaengz lajbiengz.

Seizcou dwg geiqciet gyaunde. Miz vagut gyaunde, miz va' gviq homfwd, lij miz mbawfaex henjgim loenqbyoegbyoeg. Seizcou mbwn gvyengq-cangcang, rumz liengz cifi, duzyanh baizdoi baenz yiengh cih "人", youq gwnzmbwn heusausau, sij mbouj ndaej daj baihbak mbin coh baihnanz. Go nywj duet buhheu de bae, rieg hwnj buh henjgim seizcou.

Seizcou dwg geiqciet demsou. Gomeg cug lo, riengzmeg lumj dahsau ndang reuz gyaunde nei ndwn youq gyang naz, vad fwngz coh dou ne! Go faiq hai va lo, de ndaej guh baenz denz, hawj raeuz ndaej raejrub haeuj ninz. Makcauj cug lo, de lumj baenz aen baenz aen haedfwngz nding nei, gyaunde raixcaix! Makit cug lo, de lumj baenz aen baenz aen caw nei ronghcingx, youh lumj baenz aen baenz aen lwgda gyaemq gig dwggayez..... Caen ndei yawj ha!

Seizcou caen dwg aen geiqciet demsou lai saek lai yiengh ndeu ha!

(sam nienzgaep Cwng Suigiz)

Vamaenzdoengzlingz Hai

土豆花开

Ranz daxbuz youq Sanhsih Lanzyen, Lanzyen dwg aen singz iq gyaunde gwnz gauhyenz namhhenj ndeu. Aenvih diegyouq gyang gauhyenz, moix baez ma ranz daxbuz gvaqcieng, daj Daiyenz roengz gauhdez le, lij yaek naengh heiqli 5 aen lai cung cij daengz. Mbwn nitsisi, heiqli youq gwnz loh heux bya raih doxhwnj, yawj ok rog cueng, miengj he dwg datbya sangvid, miengj he dwg luegbya laeglwd, sim gou gaenj ndaej yaek diuq okdaeu lo.

Bi' gvaq, goengloh gauhsuz doeng daengz ranz daxbuz lo. Bineix engq dwg gwnz man dem va, ranz daxbuz doeng hujci lo! Daxgux naeuz

ngoenz doeng hujci haenx, cawx fei hujci vunz lai vunz daih, mbouj dwg vih naengh ci, cij dwg vih louz mbaw fei he guh geiqniemh. Mbanjranz lizsij mbouj doeng hujci dauqdaej satbyai lo!

Gij bienqvaq mbanjranz dwg mbwn fan dei h boek, laeuz sang caeuq heiqli yied daeuj yied lai, mbouj dan daxgux haeuj laeuz moq youq, couh lienx daxbuz betcib lai bi hix yungh hwnj soujgih cinaengz lo, lij caeuq gou sibinz doengvah ne.

Daegbied dwg gij vamaenzdoengzlingz mbouj haeuj da haenx, gingqyenz baenz ciubaiz mbanjranz ceiq lwenqda ceiq gyaunde de. Binaengz bet nyied, dwg mwh vamaenzdoengzlingz youq ndaw doengh ndaw reih hai ndaej ceiq ndei yawj, mbouj dwg hai baenz caz, baenz nyup, dwg hai baenz haijva. Raq rumz ci daeuj, baenz duj baenz duj saekmaeq, saekaeuj, saekha vamaenzdoengzlingz, youq mbawmaenzdoengzlingz heuloeg dak baihlaj, lumj langhva ndaw haij foekfan, lumj ndaundeiq gwnzmbwn yubyab, engq lumj dahndiq youq ndaw doengh guhcaemz, mbouj suk mbouj souj youq laj mbwnlamz ngauznged. Danghnaeuz mwngz caijsoq ndei yawjraen haijva maenz-

doengzlingz ndaw fwnmoenq, fwn unqnem iemq miz va hom caeuq namh hom, itdingh sawj mwngz fiz bae. Vunz youq ndaw haijva byaij, va youq ndaw sim vunz hai, cungj roxnyinh neix hawj vunz gig vuenyungz, gig muemxcuk, gig gyaunde.

Maenzdoengzlingz dwg daegcanj mbanjranz, yienznaeuz mbanjranz gaenq biek gij bi' ndwen gungzhoh baengh maenzdoengzlingz daeuj dienz imq aenduengx haenx bae lo, hoeng doenghgi maenzdoengzlingz gig bingzciengz neix, youq ndaw fwngz vunz mbanjranz bienqbaenz gak cungj gak yiengh gijgwn ndei gwn. Gyauijswj suiicingh, ceiznaengj, ceizdaem, mienhliengz, faenliengz..... Yinx daeuj bouxhek daengx guek gak dieg daeuj cimzgwnz. Danghnaeuz mwngz byaij youq gwnz gai geh hongh ndaw mbanjranz, mwngz lij ndaej ngonzyawj daengz betsien gvaq haij, Sunh-vugungh, Cuhbetgaiq, Gyanghdaigungh epbya daengj lwgvunz aeu maenzdoengzlingz daeuj guj baenz haenx, gijneix cungj hawj mwngz yawj ndaej dava bae, sawj mwngz mbouj sijndaej dauqma.

Mbanjranz gou riengz yamqdin guekcoj byaij baenaj, cingq fatseng bienqvaq ngoenz ndei gvaq ngoenz. Mbanjranz dwggayez gou, gou geijlai siengj ciengq diuz go haenh mwngz ha!

(Liuzningz Swngj Bwnjih Si Mingz-sanh Gih Lienzfung Siujyoz haj nienzgaep Suh Ningz)

